



25 April 2012
25 April 2012
P.U. (A) 109

WARTA KERAJAAN PERSEKUTUAN

FEDERAL GOVERNMENT GAZETTE

KAEDAH-KAEDAH CUKAI PENDAPATAN (POTONGAN BAGI PERBELANJAAN UNTUK MENDAPATKAN PENSIJILAN 1-INNOCERT) 2012

INCOME TAX (DEDUCTION FOR EXPENDITURE TO OBTAIN THE 1-INNOCERT CERTIFICATION) RULES 2012



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

KAEDAH-KAEDAH CUKAI PENDAPATAN (POTONGAN BAGI PERBELANJAAN UNTUK
MENDAPATKAN PENSIJILAN 1-INNOCERT) 2012

PADA menjalankan kuasa yang diberikan oleh perenggan 154(1)(b) Akta Cukai Pendapatan 1967 [*Akta 53*], Menteri membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Cukai Pendapatan (Potongan bagi Perbelanjaan untuk Mendapatkan Pensijilan 1-InnoCERT) 2012**.

(2) Kaedah-Kaedah ini disifatkan telah berkuat kuasa mulai tahun taksiran 2010.

Tafsiran

2. Dalam Kaedah-Kaedah ini—

“SIRIM Berhad” ertinya suatu syarikat yang diperbadankan di Malaysia menurut Akta Syarikat 1965 (No. syarikat: 367474-V);

“Perbadanan Perusahaan Kecil dan Sederhana Malaysia” ertinya suatu pertubuhan perbadanan yang ditubuhkan di bawah seksyen 3 Akta Perbadanan Perusahaan Kecil dan Sederhana Malaysia 1995 [*Akta 539*];

“Pensijilan 1-InnoCERT” ertinya Pensijilan 1-Inovasi bagi Penarafan Enterpris dan Transformasi yang dikeluarkan oleh Perbadanan Perusahaan Kecil dan Sederhana Malaysia kepada orang yang layak yang telah diberi penarafan AAA, AA atau A oleh SIRIM Berhad.

Pemakaian

3. (1) Kaedah-Kaedah ini hendaklah terpakai kepada orang yang layak yang membuat permohonan untuk mendapatkan suatu Pensijilan 1-InnoCERT tidak lewat

dari 31 Disember 2014 yang baginya orang yang layak itu diberi Pensijilan 1-InnoCERT yang pertama.

(2) Bagi maksud Kaedah-Kaedah ini, orang yang layak adalah—

(a) seseorang dalam industri perkilangan, industri perkhidmatan berkaitan perkilangan dan industri berasaskan pertanian yang bermastautin di Malaysia, yang pada akhir tempoh asas bagi suatu tahun taksiran itu—

(i) mempunyai tidak kurang daripada lima dan tidak lebih daripada seratus lima puluh orang pekerja sepenuh masa; atau

(ii) telah mencapai jualan tahunan tidak kurang dari dua ratus lima puluh ribu ringgit dan tidak lebih daripada dua puluh lima juta ringgit; atau

(b) seseorang dalam industri perkhidmatan, industri pertanian utama, teknologi maklumat dan komunikasi yang bermastautin di Malaysia, yang pada akhir tempoh asas bagi suatu tahun taksiran itu—

(i) mempunyai tidak kurang daripada lima dan tidak lebih daripada lima puluh orang pekerja sepenuh masa; atau

(ii) telah mencapai jualan tahunan tidak kurang daripada dua ratus ribu ringgit dan tidak lebih daripada lima juta ringgit.

Potongan

4. (1) Bagi menentukan pendapatan larasan orang yang layak bagi tempoh asas bagi suatu tahun taksiran, maka hendaklah dibenarkan sebagai potongan suatu amaun bersamaan dengan perbelanjaan yang dilakukan oleh orang yang layak itu untuk

mendapatkan suatu Pensijilan 1-InnoCERT yang pertama baginya daripada Perbadanan Perusahaan Kecil dan Sederhana Malaysia.

(2) Bagi maksud subkaedah (1), perbelanjaan yang dilakukan—

(a) hendaklah merupakan perbelanjaan langsung yang dilakukan bagi permohonan yang orang yang layak itu telah diberi Pensijilan 1-InnoCERT; dan

(b) hendaklah disifatkan telah dilakukan dalam tempoh asas bagi suatu tahun taksiran yang dalamnya Pensijilan 1-InnoCERT telah diberi kepada orang yang layak itu.

(3) Perbelanjaan disebut di dalam Kaedah-Kaedah ini adalah seperti yang berikut:

(a) yuran pensijilan sebanyak lima ribu ringgit; dan

(b) perbelanjaan yang dilakukan oleh juruaudit SIRIM Berhad yang terdiri daripada—

(i) kos perjalanan pergi dan balik dari pejabat ke premis orang yang layak itu termasuklah—

(A) perbatuan, tol dan bayaran letak kereta; atau

(B) dalam kes perjalanan melalui udara, kos perjalanan kelas ekonomi dan tuntutan penukaran penerbangan;

(ii) kos penginapan dalam bilik standard atau elaun lojing; dan

(iii) elaun makan.